

Parare Domino Plebem Perfectam

A lokisetse Morena Sechaba se phethehileng (Luka 1,17)

Moeletsi oa Basotho

www.moeletsoabasotho.co.ls

LSMTA e ngongorehisoa ke sephetho



2

IEC leetong la boithahlobo

7



Mokoetlisi oa Linare o'a itokolla

12




3

BA TLAMELA 'MUSO MOKHAKHA

www.moeletsoabasotho.co.ls

Moeletsi oa Basotho



Re se re fumaneha ho marangrang

Email: newsroom@moeletsoabasotho.co.ls
Tel: +266 28350466/ Whats app: 62600983

MOELETSI

Bacha itopolleng mahlomoleng

Lefatšeng leo re phelang ho lona mehlang ena ho hloka-hala lintho tse potlakileng, motho ea sebelisang mekhoha ea khale o salla morao. Empa lintho tseo tsohle kaofela li re baketse bolutu hobane li fetotse tlholeho, 'me e se e re fetohetse ha e sa hlalisoa ka moo re neng re tloetse re bile re lebetse ka teng. Maemo a leholimo ke ntho e ka sehloohong e bakileng bolutu bo boholo, 'me Basotho joaloka batho ba temo ba tsietsing e fetang. Moraong ona ho ne ho se ho sebelisoa lihlahisoa tse potlakisang temo 'me kotulo e fihla kapele. Kajeno ho so khothaletsoa hore temo e joalo e tloheloe ho khutleloe mekhoeng eane ea khale ea ho sebelisoa mesuoela. Ho khothaletsoa haholo mokelikeli oa lithhapi.

Ho shebahala eka re se re phela re ea morao joale, hobane lintho tse ngata tse neng li tlohetse ho thoe ha li sa le nakong li ntse li khutla hanyane ka hanyane. Lihoai le eletsoa ke hona hore le hetle morao hore na ho ne ho lengoa joang khale, li lebale ka tsena tsa sejoale-joale. Khopolo ke hore le tla etsa joalo hobane ruri masimo a mang a fetohile lithite, mohlomong e le hobane beng ba ona ba se na mokhoa oa ho lema. Ha ba bang bona ba lekile ho lema lilemo-lemo, empa ba sa fumane chai ka lebaka la mokhoa oa ho lema. Mesuoela le manyolo a liphoofolo a se a e-na le mosebetsi le hoja le tsona liphoofolo tseo e se e le mathata feela.

Ke lehlakoreng le leng re boetse re bona mekhoha ea khale e meng le eona e se e fetohela hobane e sa tlise litholoana tse molemo. Motho ha ne a ile sekolong a bile a phethe-tse lithuto tsa hae Sekolong sa Thuto e Phahameng, o ne a etsa kopo ea mosebetsi 'me a ema lilemo hore a fumane mosebetsi. Tloaelo ena bohle re e antse ho baholo ba rona hoo re seng re sitoa ho hlokomela leha e se e sa re tsoele molemo. Bacha ba bangata ba khothaletsa ba bang ho sebelisa litalenta tsa bona ho ithehela likhoebo e le hore ba tsebe ho iphelisa.

Ba bang Morena o ba file litalenta le limpho tseo ba sa hlokenge le hore ba ee sekolong ho li matlafatsa, empa kaha ba ile sekolong ba tsoere mangolo a matelele ha ba ikutloe ho tsoara ka matsoho. Linako li fetohile taba eane ea hore motho o tla emela ho fumana mosebetsi oa ofisi e felile, hona joale ho pheloa ka hore motho a ikhire. Lehlohonolo ke hore taba ena e tla thusa hape hore mohiri ea joalo a boele a hire bana babo ba ntseng ba shoela ka tlang ke tlala.

Bacha ak'u theheng mekhatlo le ikopanye 'moho ka litalenta tsa lona tse fapakaneng le etse koporasi e kholo Lesotho mona ea thaka e ncha. Nkang mohlala ho melata ena e teng kahar'a naha, batho bano ba tseba ho thusana. Basotho ba ne ba tumme ka ho tsoarana ka matsoho, ho se mohla e mong a ka robalang ka tlala. Lona bokamoso ba Lesotho botsang baholo ba lona hore na boikapano bo hloka eng, kapa le iketsetse lipatlisiso hobane mekhoha e se e le mengata.

Tlohelang ho lula hohle mona kahar'a maqujoana moo le qetellang le entse litlolo tsa molao, hobane likelello tsa lona li sa etse ntho e nang le molemo. Booko ba lona bo sa le chatsi ha boa lokela ho lula, sebelisang litsebo tsa lona tsa sekolo le bohlae ba tsoalo ho ithehela mosebetsi le ho thusa ba bang. Ha ho na motho ea tla theoha leholimong a tl'o le fa chelete, sebelisang se senyane seo le nang le sona. Tsohle tseo le li bonang ha li'a ahoa ka matsatsi a mararo kapa ka chelete e ngata. Qalang hanyane le bokelle le tšepahallane le tla bona lintho tsa lona li tla loka.

LSMTA e ngongorehisoa ke sephetho

Nthabeleng Seitlheko

Lithuto tsa Lipalo le Mahlale ke mokokotlo kholong ea naha 'me hona hore likolo tsohle, litichere le barutoana ba lokela ho sebetsa ka matla 'moho, ho ntlafatsa thuto ena e le hore e tle e be le litholoana tse hlabosang. Tsena li boletsoe ke President ea Naha ea Mokhatlo oa Litichere tsa Lithuto tsa Mahlale le Lipalo (LSMTA), Keketso Leteba, puisanong le Koranta ka la 24 Pherekhong monongoaha.

O supile hore sephethong sa bona thuto ea Mahlale le Lipalo ha li'a sebetsoa hantle ke barutoana papisong le lithuto tsa mantlha. O re ha ba se ba kena kahar'a thuto ka 'ngoe lilemong tse fetileng ho tloha 2021, 2022 le 2023, sephetho sa thuto ea Mahlale se ntlafetse kaha selemong sa 2021 ba bile le 25.7%, 2022 ebile 16.1%, 2023 ebile 22.1% lilemong tsena e ntse e phahama hanyane. O re thuto ea lipalo naha ka bophara ha ho'a sebetsoa hantle ho hang, empa leha ho le joalo, 2021 ebile 6%, 2022 ebile 6.1%, 2023 ebile 11.2% 'me hona ho bontša hore ho na le ho phahama hanyane.

O re ho nyolla tšebetso lithutong tsena tse peli, ba tl'o etsa lipatlisiso likolong ka ho fapakaneng, ho ithuta moo mathata a bileng teng. A re ba hlokometse hore baithuti ba khetha lithuto tse ba imelang hobane ba nyefolana kapa ho nyelisana liqetong tseo ba li etsang, haholo thutong tsa lipalo kaha li fapakaneng. O re taba ena ke eona e etsang hore thuto ea lipalo e bonahale e ntse e thefuleha, ka hoo baithuti ba lokela ho itekanyetisa ha ba khetha lithuto eseng ba ikimetse.

A re e le litichere ba eletsa barutoana ho se itime monyetla oa ho sebetsa ka thata, ka ho itsetleha ka likeletso tsa bona ka bomong eleng ho amang sephetho. A re ho

feta mona ba behile ka likelelong tsa bona hore thuto tsena li thata le hoja e le tsona tse jereng bokamoso bo matla ba morutoana. A re ba lokela ho lokisa boitsoaro ba bana ha ba ea ba lebane le thuto ena, le hore batsoali ba khaotse ho bua lipuo tse nyahamisang.

A bontša boikapano ba litichere likolong tsa Mathomo le tse Phahameng e tla ba ntho ea bohlokoa ho tšohla liqholotso tseo ba tobanang le tsona hore ho be le neheletsano ea mosebetsi. A re ho hlola liqholotso, ba se ba fihletse litekere tse supileng 'me ba kopane le litichere ho thakelana ka malebela le hore ho be le litholisano tse ngata litabeng tsa lithuto tsa mahlale, ho ntlafatsa litsebo tsa bana le lerato lithutong tsena.

A re bona e le mokhat-

lo ba tl'o etsa hore litho tsa mokhatlo tsa likolo li fane ka tšebetso ea tsona moo ba tla qolla likolo tse sa sebetsang hantle, nakong ea lithahlobo tse kopanetsoeng ke baithuti hore li thusoe ho matlafala. A re ba tl'o tsamaea ka leoto le tsoanang likolong ka tataiso ea lenane-thuto le tsoanang hore likolo li be boemong bo tsoanang nakong eo ba rutang baithuti.

H'a phethela, o itse ba tl'o ba le lithupelo tsa litichere tse nang le litsebo hore ba tsebe ho ntlafatsa tšebetso ea bona, hape ha se taba e bonolo e ka feteloang ke litichere feela, batsoali ba leke ho lokisa tsela eo ba buang lithuto tsa mahlale ka eona, kaha thuto eo e fetoha sera ngoaneng. Thuto ke pitsa e maoto a mararo e hlokanang ho kopaneloa.

Petroleum Fund e ithomella sechabeng

Nthabeleng Seitlheko

Ele ho anetsa thuto ka tšebeliso e bolokehileng ea mafura, khase le paraffin, Petroleum Fund e ithomella sechabeng sa Thaba-Tseka ho fana ka thuto, molemong oa tikoloho e baballehileng le bophelo ba sechaba joaloka baji ba litšebeliso tsa mafura ka mefuta e fapakaneng. Tsena li hlalositsoe ke Mookameli Ofising ea Liphatlalatso Petroleum Fund, Rorisang Mahlo, puisanong le Koranta, ka la 24 Pherekhong monongoaha.

O re letšolo lena la ho fana ka thuto sechabeng le qalileng ngoahola le se le fihletse liter-eke tsa Mokhotlong, Qacha's Nek le Mohale's Hoek, 'me le tl'o anela litereke tsohle. A re ho bontša hore thuto e tla fanoa e anetse, ba tla araba lipotso ka nepo ba tla hapa limpho, hara tsona ke setofo sa khase, mafura a Engene, li 'voucher' tsa ho tšela mafura le khase le tse ling tse ngata.

O itse Petroleum Fund ke setsi sa khale seo qholotso ea kanetso ea thuto sechabeng e neng e fokola, ka lebaka la bosieo ba ofisi ea liphatlalatso. A re thuto ka nako eo e ne e sa fanoe 'me ba nang le litseba kapa mekhoha ea polokeho ho lihlahisoa tseo.

Mahlo o re ho ee ho be le litlaleho tsa matlo a chang ka lebaka la khase e ileng ea phahloha, 'me lebaka ke tsela eo batho ba e tsoaroang ka eona ha e tloha sebakeng sa

thekiso. A re khase ea 48kg e lokela ho boloko sebakeng sa eona se ikhethang, le baqhobi ba se ke ba sebelisa mehala ea thekeng ha ba le sebakeng sa ho tšela mafura, kaha e sebelisa mollo le matla hoo e ka chesang setsi kapa koloi.

A re ba bang ba fihla libakeng tse joalo ba ntse ba tsuba 'me seo se ka chesa sebaka se joalo ka lebaka la leshala le oeleng, ha malapeng batho ba lokela ho hlokomela libaka tseo ba behang mabone ho tsona. A ipiletsa ho batho ho mamela lithokomeliso le ho itloaetsa ho etsa seo ba se bolelloang hobane libaka tsa mafura li kotsi. A re moo ba fetileng teng ho Basotho ba sebelisang khase le paraffin ho pheha le ho palama likoloi, ba bona liphetho hoo ba qetellang ba fetisetsana litsebo e le sechaba.

O bontšitse mekhoha e meng e tla sebelisoa ho fetisa thuto e le ea lingoloa tseo motho a ka li balang, leha a le lapeng kapa bana ba ithuta. O re takatso ea bona ke hore Basotho ba sebelise lihlahisoa tsa mafura ka polokeho, 'me ba habile hore thuto ena e phele kahar'a sechaba ho fokotsa sekhahla sa mello. A re ba bone ho le bohlokoa hore ba etele litereke, 'me ba tla boella khafetsa hore ba tsebe ho fihla litsing tse kahar'a litereke e le hore lihlahisoa tsa mafura li sebelisoa ka nepo.

A re kahar'a naha lihlahisoa tsa mafura ha li fumanehe hohle, ka hona ho arabela tlhoko ena, setsi sa habo se thakhotse sehlahisoa se secha sa 'Mobile Filling Station' se tl'o eketsa palo ea litsi hore li fumanehe ka lithabeng.

Contacts: +266 28350 466 / 6260 0983 (Whats app)
Email: moeletsioabasotho@gmail.com

MOELETSI oa **BASOTHO**
A LOKIBETSE MORENA SECHABA SE PHETHEHILENG (LUKE 1:17)

Editorial

Lesoetsa Rakubutu (Editor)
(+266) 58490670 / 62031949
editor@moeletsioabasotho.co.ls

Lehlohonolo Mohale (Sub-editor)
(+266) 58 771 507 / 62 771 507
subeditor@moeletsioabasotho.co.ls

Advertising

Thabo Lesaona
(+266) 28 350 466/ sales@moeletsioabasotho.co.ls

Newsroom

Nthabeleng Seitlheko 57 665 038/ 68 216 721
nthabeleng.seitlheko@moeletsioabasotho.co.ls

Tšelisio Thakholi (Sports) 58 540 853/ 63 480 404
tseliso.thakhuli@moeletsioabasotho.co.ls

newsroom@moeletsioabasotho.co.ls

Production Desk

'Mateele Liqa, Sr. Canicia Nthunya

Nthabeleng Seithleko

Ba tlamela 'muso mokhakha

Moetapele oa Mokha oa Sechaba sa Basotho (BNP) Machesetsa Mofomobe le oa Khoetsa ea Sechaba (PFD) Adv. Lekhetho Rakuoane, ba re paramente e bonahala e phomotse e lebetse ka boikarabelo ba eona ba ho etsa melao e ka lopollang Naha ea Lesotho mae-mong a hloabaetsang

ao e leng ho ona, ba re sena se ba susumet-sa hore ba tlamele ba 'muso mokhakha hore ba se bapale ka sechaba, ba sebetse, etsoe ba khethiloe ke sona. Tsena li hlaheletse puisanong le baetapele bana, ka mohala ka la 25 Pherekhong monongoaha.

Ba re ba ngongorehisoa ke hore paramente e qetile

selemo joale ho se melao e fetisoang le litšisinyo tse etsoang ke bohanyetsi, ba e etelletseng pele ba lula ba li nyahlatsa ka le reng ha li'a potlaka. Ba re bengahali ba pusong ba bonahala ba ichebile bo bona, ba sa re letho ka sechaba 'me hona ke sesupo sa hore pusong ba ne ba tlela ho tla ithuisa ka lichelete tsa sechaba, e se ho arabela litlhoko tsa sona.

Mofomobe o re esale babusi ba hona joale ba se na thahasello ea ho sebeletsa sechaba ba tllile cheleteng le ho tla ithuisa, 'me sena se pakoa ke hore a hlahise kapel'a Ntlo ea Bakhethoa hore Kamphani ea Mehala 'Vodacom' e khutlise lichelete tsa sechaba ha li lahlehile, empa Letona la Lichelete Dr. Retšelisitsoe Matlanyane a hana hore taba eo e sebetsoe, le hoja e ne e kotela mafutsana kaha batho ba ka lahla lichelete ka phoso. A re litaba tsa libukana tsa ho eta o ne a kope paramente ho li tšohla ba li nyahlatsa 'me kajeno Basotho ba bang ba felloa ke mesebetsi ka leb-



aka la bokhopo ba batho ba iphapanyetsang ho etsa se nepahetseng.

O re ha ho na mohla morui a ka nahanelang mofutsana 'me litaba tsohle tse etsahalang kahar'a naha le tsamaisong ea paramente ke hobane ba pusong ha ba na nako ea sechaba, ba arabela litlhoko tsa bona. A re ho fihlela hona joale ha ho na le molao o le mong o entsoeng ke 'muso, empa tebello ke hore joalokaha Tona-Kholo

a ile a tšepisa ho fetola naha ea Lesotho Dubai, seo se tla iponahatsa khakanyong ea lichelete ea selemo sa 2024. A re Basotho ha ba lokele ho tšosoa ke maemo ana, kaha likholo li sa tla.

Adv. Lekhetho Rakuoane eena o supile hore o khatetse matla ho bona paramente e tsamaea butle litabeng tsa tlhahiso ea molao, kaha esale ho khutsa ka ho hlomathisoa ha molao oa lithunya le toantšo ea bosholu ba liphoofole. A re ba lokelang ho hlophisetsa litaba tse joalo e le botsamaisi ba paramente hore melao e tsebe ho fetela likomiting ba mometse, ba iketlile le 'muso ha ho na melao eo o e kenyang kahar'a ntlo.

O re ka toka litulo tsa likomiti li lokela hore e be li ntse li tsoelapele empa esale ho khutsa. A re ba tsekile taba ea ho se kopane ha likomiti tsa paramente ka maboteng a bona a marang-rang, 'me ba ntse ba khutlela paramenteng ho se mosebetsi o tla tšohloa oa sechaba esita le litlaleho tsa likomiti.

A re ho bontša hore babusi ba nka litaba tsa sechaba ha sesanyane ho khothaletsa sechaba ho phamolela litaba tsa ketekelo ea lilemo tse 200 sechaba sa Basotho se thehiloe, empa paramente e ntse e mometse ka litaba tseo le komiti feela ha e-s'o thehoe, e tla hlophisa molao oa Basotho.

H'a phethela o re babusi ba hona joale o belaela ba phathantsoe ke likhoebo tsa bona ba lebetse ka boitlamo ba ho sebeletsa Basotho. A re batho ba seboko ka litšebeliso tse ba sekisetsang tsa 'muso.

Ho ea ka lengolo le potolohang le tekenetsoeng ke Mongoli oa Paramente, Adv. Faene Maema KC, tulo ea Paramente ea 11 e tla ba ka la 9 Hlakola 2024 ho ea ka molaoana oa tsamaiso oa 14(2).



Motšoaruoa ea balehileng o tšoeroe Mangaung

Nthabeleng Seithleko

Setsi sa Tlhabollo ea Batšoaruoa se tšoeroe ka matla ho bona hore motšoaruoa ea ileng a thoba chankaneng, o khutlisetsoa kahar'a naha semmuso, tlasa tšebetso e etsoang ke Lekala la tsa Lehae, Sepolesa le Borena. Tsena li boletsoe ke Chief Officer Bokang Ramotena, ka la 24 Pherekhong monongoaha.

Bokang Molengoane ea ileng a thoba kahar'a naha o ile a tšoaroa a le Mangaung Afrika Boroa, 'me ha joale o ntse a panya-panya Setsing sa Tlhabollo ea Batšoaruoa naheng eo, a emetse nyeoe ha ho ntse ho emetsoe tokiso ea hore na o tla joang kahar'a Naha ea Lesotho kaha a kene naheng eo a se na litokomane, ka hona o ahlotsoe M1,000.00, kapa ho hoehla Setsing sa Tlhabollo ea Batšoaruoa naheng eo nako ea matsatsi a 30.

O re setsi se ile sa mo lefella chelete eo hore a se ke a lefelloa ke mang kapa mang kaha a tla lokololeloa bao, 'me ha joale eo e se e le motšoaruoa ea

ikarabellang Setsing sa Batšoaruoa kahara naha.

Litlaleho tsa Litsi tsa Tlhabollo ea Batšoaruoa ba amohetsoeng le ba lokolotsoeng naha ka bophara, ho tloha ka la 15 ho isa 19 Pherekhong monongoaha, li eme tjena; ke batšoaruoa ba 52, banna ba emetseng linyeoe ba 45, ba ahlotsoeng ba supile. Liqoso le likahlolo tsa bona, ke tse fapakaneng bona ke matsalloa a mabeli a Naha ea Zimbabwe, ba keneng kahar'a naha ba se na litokomane, ba ahlotsoe M20.00 motho ka mong ba se ba lefile chelete eo, ba ntse ba le

ka Setsing sa Tlhabollo ea Batšoaruoa, 'me Lekhotla le laetse hore ba khutlisetsoe ha bo bona pele ho matsatsi a 30.

Monna a le mong o ahlotsoe ka nyeliso ea Lekhotla selemo kapa ho itefella M1,000.00 ka ho rua sethunya le mahlahlela ka thoko ho molao, monna a le mong o ahlotsoe lilemo tse tharo kapa ho itefella M3,000.00, ho qheketsa malapeng monna o ahlotsoe lilemo tse tšeletseng kapa ho itefella M6,000.00. Teko ea polao monna o ahlotsoe lilemo tse 15 kapa ho itefella M14,000.00. Ho

apola likobo ka sheshe ke monna a le mong o ahlotsoe lilemo tse 15 a sa itefelle.

Batšoaruoa ba emetseng linyeoe naha ka bophara ke banna ba 45, liqoso tsa bona ke lipolao banna ba 12, ho khakhatha banna ba supileng, ho qheketsa malapeng banna ba supileng, teko ea polao banna ba bane, ho apola likobo ka sheshe banna ba supileng, bosholu bo tloaelehileng banna ba bane, bosholu ba boqhobane banna ba bararo, bosholu ba likoloi banna ba babeli, nyeliso ea lekhotla monna a le mong.

Batšoaruoa ba lokolotsoeng naha ka bophara ba 57, basali ba babeli le banna ba 55, ka tlasa mekhahlelo oa pele batšoaruoa ba itefelletseng 'bail' banna ba 32, ba itefeletseng 'fine' banna ba tšeletseng, ba qetileng likahlolo ke banna ba bahlano, ba lokolotsoeng tlasa 'Speed trial' ke banna ba bahlano, ba lokolotsoeng ho ea ikalosa banna ba bane, ba lokolotsoeng hobane linyeoe tsa bona li fanyehilo ke monna a le mong le basali ba babeli, monna a le mong o lokolotsoe hobane nyeoe ea hae e hutsoe le monna ea fihletseng tumelano ka thoko ho lekhotla.



Bacha ba sebelise lineo

Tseliso Thakholi

**sang selemo sa bo-
beli lithutong tsa Bophatlalatsi. Tlalane o li beha tjena:**

Taba ena ea mopheho e sale e le ntho eo ke e ratang ho tloha ke sa le monyenyanane, moo teng ke neng ke rata ho thusa batsoali ba ka ho pheha ka lapeng. Ke ne ke rata haholo ho shebella le ho ithuta mefuta e fapakaneng ea mepheho, 'me ke ile ka rata ho ithuta ho etsa likuku le 'biscuits' ka

boletse khoebo ea ka ke ea ho hlahisa 'biscuits', 'me ke rata ho bona e holile, e se e le kamphani e kholo ho hlahisetsa bacha ba bang mesebetsi ka litsebo tseo ke nang le tsona.

Ke rata ho hlokomelisa bacha hore ho itšebetse ho monate ho feta ho hiroa, hobane ha ho na motho ea tla laola mesebetsi oa hao. U tsoha ka nako eo u e batlang, u etsa ka matla ohle ho

bona hore khoebo ea hao e-ea hola ka makhetha e maholo.

'Na ke qalile mesebetsi oa ka ka tšebetso ea batsoali ba ka ba ntseng ba ntšehelitse le hona joale, ho ba ha ke le sieo ke ile sekolong ba sala ba ntse ba pheha, ba rekisa le ho bapatsa khoebo ea ka. Ke leboha ka mokhoa o khethehileng tšebetso eo ke e fumanang ho batsoali, metsoalle ea ka le ho Kereke ea heso

e Katholike, ka hore ha ho e-na le mekete e meholo kerekeng, ba mpha monyetla oa ho rekisa le ho bapatsa khoebo ea ka. Ka 'nete mesebetsi ona oa ka o bonahala o atleha ka lebaka la tšebetso, ke re esita le ho batho ka bo-mong, ba ntseng ba reka. Hangata ba li paka makhetha le monate o lutlisang mathe.

Kamorao hore ke etse mopheho ke ntse ke ntšetsapele lithuto tsa ka pele tsa Bophatlalatsi IEMS. Ke tla li khanna li le peli kaha morero oa ka ke ho thusa bacha ba bang tlhahisong ea mesebetsi le ho ba le katleho. Bacha bao e bang mohlo-mong ha ba e-s'o hlokomele hore ke mohlalisi oa likuku le 'biscuits', kea tseba ho tloha kajeno ha ke buile koranteng ena e boulelang le ho rata bacha, le tla ntšehetsa e le hore le 'na ke tsebe ho hola ke tle ke le tšebetse ka ho le hlahisetsa mesebetsi.

Bacha ba ka ratang ho tla tseba ha holoanyane ka ho etsa 'biscuits', mamati a butsoe le ka tla ra tla thakelanang ka malebela. Ka litsebo tseo le nang le tsona le ka ikopanya la theha likoporasi tse kholo, e ntse e le e meng ea mekhoha ea ho itšematlela. Haele nako ea ho batla mesebetsi kea tiisa ke re e feletsoe ke nako. Re ka tseba ho phela ka lineo tseo Morena

Mo c h a
o a H a
M a b o t e
S e t e r e -
k e n g s a M a s e r u ,
A u s i T l a l a n e R o s e -
m a r y M o l e f i e a t s e -
b a h a l a n g h a h o l o k a
l e b i t s o l a ' C h i n n a ' ,
e a h l a h i s a n g m e -



**futa e fapakaneng
ea 'biscuits', o ile a
phura leshoetla le
motlalehi oa Koran-
ta ka la 24 Pherek-
hong monongoaha,
ka sepheo sa ho hla-
hisa le ho tsebahat-
sa mesebetsi oo a
o etsang oa ho etsa
likuku le 'biscuits',
moo a khotla-
letsang bacha, ho
itlhlahisetsa meseb-
etsi ka litalenta tsa
bona, le mokhoa oa
ho iphelisa. Ka ho
khetholoha o etsa
mofuta o bitsoang
Butter Biscuits (BB).
Ausi Tlalane ke
moithuti Sekolong
sa IEMS moo a et-**

mefuta ea tsona. Ke ile ka ea sekolong sa mopheho ka ithuta tsona.

Ntho eo hangata ke ithutileng eona ke hore boholo ba bacha ha ba e-s'o hlokomele hore ho sebetsa ha se ho hiroa feela, empa le ka mesebetsi ea matsoho ea litsebo tseo ba nang le tsona ba ka iphelisa. Ka litalenta tsa bona ba ka tseba ho hlahisetsa naha ena mesebetsi e mengata.

Bacha ba bang ba lutse ka litalenta tsa bona, ha ba lokela ho hlahisa mesebetsi. Bacha ba heso ka litalenta tsa lona le ile sekolong kapa le sa ea le ka hlahisa mesebetsi. 'Na joalokaha ke se ke



Nthabeleng Seitlheko

Mooki ebile e le Mopepisi, Setsing se Ikemetseng sa Bophelo 'The All Clinic', Raphiel Tlali, o re setsi sa habo se thakhotse leano la ho pepisetsa bakhachane malapeng, haholo ba se nang mathata nakong ea pelehi, le ba fihlelang liphelelo tse hlokalang tsa sebaka nakong e joalo. O hlalositse tsena, puisanong le Koranta, ka la 24 Pherekhong monongoaha.

O re ho pepela hae ha se phoso, ebile ha se ho tsoa leano la Lekala la Bophelo tlaase, empa se hlokalang ke ha motho a pepisoa ke setsebi sebakeng se bolokehileng.

Pelehi ea malapeng

A re ba ntse ba khothaletsa hore bakhachane ba ee Litsing tsa Bophelo joaloka tloaelo, empa ba nang le khahleho ea ho pepela malapeng, ba etse seo ka tumellano le litsebi molemong oa polokeho le bophelo bo botle ba 'm'a le lesea. A re batho ba lokela ho

ba le tsebo ka litaba tsa bophelo le ho ntlafatsa bophelong ba bona, 'me joaloka litsebi ba fana ka thuto mabapi le bophelo bo botle nako le nako, ho tlosa letsoalo sechabeng le ho ipapisa le liphetoho tse teng lefatšeng.

A re mokhachane o ikhethela hore na o hlo-

ka ho pepa joang, 'me ba mo alosa ho fihlela nako ea ho pepa. A re mokhoa ona o mocha oa ho pepela hae a pepisoa ke litsebi, ho na le liphelelo joaloka ea nang le tsoekere ea bokhachane, phallo e holimo ea mali, ea ileng a ba le mathata nakong ea pelehi, moo ngoana a ka fumanoang a le boemong bo seng botle, ba khothaletsa ba joalo ho ea setsing.


A re ha ho na letho le mohlolo leo bakhachane ba ka le lebellang, kaha ba hloka metsi a phallang, ho beha lelapa leseling le ho tlatsa foromo e lumellang batho ho etsa joalo.

A re mokhachane o fumana tšehetso ea lelapa le ho thusa ho atametsa kamano nakong ea leeto le boima la pelehi. A re joaloka pelehi efe kapa efe ho ntse ho ba le liqholotso ha motho a pepela

hae kapa setsing 'me a ka fetisetsoa sepetlele. A re liqholotso tsa ho pepela hae, li ngata 'me motho ea qalang ho pepa o khothaletsa ho ea Setsing sa Bophelo. O re ba fana ka thuto ho motho ea hlokalang ho pepisoa, ka liente ho ngoana ho thusa ho tsepamisa maikutlo ha qeta ho pepa.

A re ba boetse ba ba le mooki ea ntseng a alosa motsoetse kamor'a pelehi ho bona hore bophelo ba hae bo hantle, 'me ba thusa naha ka mefuta eohle ea pelehi. A re ba batla ho sebetsa ka matla hore motho ea pepang a be le bolokolohi ebile ha se bokulo ke leeto la bophelo le lokela ho utloisiseha le ho amoheleha.

Tlali o re ba lokela ho tsamaea le lipheto-phetoho tsa lefats'e, kaha linaheng tse ling ho na le batho bao e saleng ba pepela malapeng empa ho khothaletsa polokeho.



Mooki ebile e le Mopepisi, Setsing se Ikemetseng sa Bophelo 'The All Clinic', Raphiel Tlali,

Lekala le ananele litsebo tsa Basotho

Nthabeleng Seitlheko

Mohlalasi oa lijo-tlatsetso 'Nutri-Mix' Lebohlang Ramosoeu, o re o sebelisa litholoana tse tsoakiloeng ka litlama ho thusa Basotho ho phahamisana sesole sa 'mele, ho laola phallo ea mali le ho e chorisa, kaha e le tsona sehlohlo sa bophelo bo botle. O boletse tsena puisanong le Koranta ka la 23 Pherekhong monongoaha.

O re sehlahisoa sena se sebetsanang le litaba tsa bophelo bo botle, se entsoe ho sebelisoa litholoana, ka hona Basotho ba noe litlama hobane li bohlokoa haholo ebile li bolokehile. A re ha motho a kha setlamatla a se pheha a se noa, ha se hloke li chefo e ka se etsang hore se bolokehe nako e telele eleng sona se kotsi 'meleng. A re ho

bohlokoa hore motho a je sehlahisoa 'moho le tholoana hobane ke hona moo matla a hlokoang ke 'mele a lutseng teng.

O re kahar'a Naha ea Lesotho litsebo tsa Basotho ha li ananeloe, empa 'muso o phamolela holimo lihlahisoa tsa lichaba tsa linaha tse ling, 'me hona hore tlhahiso ea meriana leha e phahame kahar'a naha ha e na molemo hobane bahlahisi ba eona ba fella kahar'a naha, ha ba iphumane ba ile linaheng tse ling.

A re taba ena e beha bophelo ba Basotho tlokotsing hobane naha e lahlehela ke botsebi bo teng, hobane e nyahlatsa boikarabello ba eona ba ho ts'ehetsa litsebo tsa Basotho. A re litlama tse tsoakiloeng ke pheko e matla e bile e etsoa ke litsebi, e ka matlafatsa Naha ea Lesotho ka pokello e matla ea lekhetho le hore meriana ea litlama e ka sebelisoa ho pheko la mafu a mangata a tjametseng linaha.

O re e bang Naha ea Lesotho e sa bonts'e mat-

la a boqapi ba Basotho sena se tla hulela kholo ea naha morao, 'me ha ho na ho tsebahala hore naha e na le boiphihlelo ba tlhahiso. A re o lumela hore ke nako ea hore Basotho ba itloahetse ho lema litlama liratsaneng tsa bona, ba li sebelise ho iphekola haholo ka litsoa-mobung kaha li na le matla ho feta tse seng li tsoakiloe ka li chefo tse matlafatsang sehlahisoa.

O supile ha batho ba bangata ba le tlokotsing ea bokulo le ho shoa ba bolaoa ke mafu a ka pheko lehlang ka lebaka la ho nyefola le ho nyelisa meriana e entsoeng ka litlama. A re ho na le hore Naha ea Lesotho e imeloe ke theko e holimo ea litlhare, ho ne ho le bohlokoa hore Litsing tsa Bophelo ho be le litsebi tsa litsoaki tsa litlhare tsa Sesotho, ho baleha ho ata ha mafu a sa pheko lehlang.

H'a phethela o itse o khothaletsa Lekala la Bophelo ho phahamela mapoqo, ba etse melao e lumellang hore Litsing tsa Bophelo tsa 'Muso ho be le meriana ea Basotho.



Mohlalasi oa lijo-tlatsetso 'Nutri-Mix' Lebohlang Ramosoeu.

Tsosoloso ea temo

Nthabeleng Seitlheko

Mo e t a p e l e o a B a c h a L e k h o t l e n g l a P u s o e a S e c h a b a (D C) P h e e l l o S e h l a b a k a, o r e b a c h a b a l o k e l a h o i t s o a r e l a k a m a t s o h o a b o n a h o h l a h i s a l i j o m a s i m o n g l e m a l a p e n g, e l e k a r o l o e a b o i p h e l i s o l e t l h a h i s o e a m e s e b e t s i. O h l a l o s i t s e t s e n a p u i s a n o n g l e K o r a n t a, k a l a 23 P h e r e k h o n g m o n o n g o a h a.

O re ba etse seo ho sa natsoe hore na ha motho o na le chelete e kae ho qala khoebo empa a qale ka se senyane seo a nang le sona. O re ha bacha ba ka sebet-sa ka leano la ho kopanya matsoho ho iqalla mosebetsi seo ba tla tsoelapele litabeng tse ba amang hape ba be le seo ba se behang tafoleng.

A bontša hore litaba tsa temo o hotse li etsahala empa ntho e kholo e ileng ea thokola pelo ea hae ke ho bona Naheng ea Chi-



na hore moruo oa eona o itšetlehile temong, nakong eo a neng a ile boithutong teng. A re o bone ho le bohlokoa ho tsoella bacha

se na le ho ba eletsa ho kena lipolotiki, empa tse buang ka ntlafatso ea bophelo ba bona.

H'a tsoelapele o hlalosi-

tse hore o ile a nehelana ka lipeo Sekolong sa Mathomo sa Makhaleng, ho tsosolosa moea oa temo ho litichere le baithuti. A re o hotse a tse-

ba ba lema sekolong seo hoo mafelong a selemo ba neng ba ea malapeng ka li-phutheloana tsa moroho.

O re taba ena e ile ea etsa hore a fane ka lipeo ho tsosolosa lerato la temo ho baithuti le litichere hore bana ba hole ba tseba hore temo e na le bophelo, le hore e ka fetola bophelo ba bona. A re ha 'muso o ka tšehetsa Likolo tsa Mathomo le ho khothaletsa baithuti ho lema ba tla hola ba tseba ho itšematlela ka temo, ho sebelisa lirapa tse kholo, tse nnyenyane le masimo hantle le ho boulela mobu kaha ba tseba hore hoo ke taemane.

Sehlabaka o re Naha ea Lesotho e lokela ho susumetsa ka matla lerato la temo ho baithuti, likolo li bonahale ka meroho le litho-loana ho ba kenya moea oa lerato la temo, 'me sena se ka matlafala ha likolo li ka qalella ho tsoara litholi-sano ka litaba tsa temo le lipontšuo, 'me baithuti ba ipabotseng ba fuoe limpho.

O re moeeng oa hae ha joale ho se ho lutse hore a tsetele temong kaha baithuti ba tla iponahatsa ka liketso. A re o fane ka lipeo tsa rapa, sepaile le spinach hobane ke meroho e hlokoang ke batho bohle.

Temo ea tlholeho

Nthabeleng Seitlheko

Molekane Culture Farmers Network, e kene letšolong la ho thakela lihoai ka malebela a temo e sebelisang lihloliloeng molemong oa tlhahiso ea lijo tsa boleng. Tsena li boletsoe ke Mothehi oa Khoebo ena, Keletso Molekane, puisanong le Koranta, ka la 23 Pherekhong monongoa.

O re lefatše le hlokometse hore ho na le lichefo tse kotsi tse sebelisoang ho thusa lijalo ho hola ka potlako, 'me ho khothaletsoa temo e baballehileng, e sebelisang manyolo a tlholeho. O re morero o moholo oa bona ke ho phahamisa moea oa bacha litabeng tsa temo hore ba tsebe ba ka iphelisa ka lijalo tse teng ba sa reke limatlafatsi.

A bontša lintho tseo ba khothaletsang batho ho li sebelisa e le manyolo le mekelikeli e etsoang ke tlhapi, e le hore bana ba Basotho ba tsebe ho ba le litsebo tsa ho iphelisa le ho tsoa kahar'a litlolo tsa mo-



lao.

O re ha ba hlahisa lijo tsa boleng boholo ba tla tseba ho hlahisa mesebetsi, 'me e tla ba temo-khoebo hobane e khaola matsoho a batho sebakeng sa ho kena temong ea theko ea mekelikeli e boima. A re mesebetsi ha e eo ka hona bohle ba ikakhele temong kaha ke nkokono, 'me e bang bacha

ba ka kena temong ba tla hlola mathata ohle ao ba tobaneng le ona.

A re motho haele sehoai o sebetse 'moho le batho ba bang ka hoo bacha ba kopanye likelello le matsoho a bona ba tsebe ho fetola bophelo ba bona. A re o qalile morero ona ka Pherekhong 2022, 'me o Rupertse Basotho ka mekhahlehlo

eo hle, ho rua likhoho tsa Sesotho ka tsela e ntlafetseng, ho li atisa le ho li hlokomela ha li kula, ho ithlahisetsa

tsoelapele ho etsa mosebetsi o joalo, 'me ke takatso ea hae ho bona ba pusong ba mo ela hloko ka moseb-

manyolo, ho loantša mafu a ka hlaselang lijalo tsa bona ba sebelisa limela le litlama-tlama tsa tlholeho tse teng kahar'a naha.

A re morero o moholo ke ho hlola qholotso e kholo e tobaneng le lefats'e ea phetoho ea boemo ba lehlimo, hobane e ka ho fela ha batho ba sebelisa temo e baballehileng. A re o ntse a

etsi oo ao etsang 'me ba mo khahlametsa ka litsela tsohle ho ntlafatsa litsebo tsa bana ba Basotho.

H'a phethela o re o ne a kene Mokhatlo oa Masupa-tsela oo a ithutileng ho etsa eseng ho bua a sa phethahatse, 'me o na le takatso ea hore bahoebi le 'muso ba ka tsetela litse-bong tsa hae.

Basotho ba rate naha-Phakisi

Nthabeleng Seitlheko

ka la 23 Pherekhong monongoaha.

Ketekelo ea lilemo tse 200 sechaba sa Basotho se thehiloe e lokela ho kenyeletsa marena ohle a neng a tsamaisana tsela le Morena Moshoeshe I, hobane ba bile le seabo polokehong ea Basotho, eseng ho qolloe eena feela. Tsena li hlalositsoe ke Mookamedi oa Mokhatlo oa Trans Africa Patriotism, Moiketsi Rasefaloana Phakisi, puisanong le Koranta,

O re ho tloha ka selemo sa 1966 Lesotho le fumane boipuiso ho ile ha qaleha meferefere ea lipolotiki, tse se nang khotso le botsitso, 'me tsa tliša likarohano ho Basotho. A re kajeno le tlhopho-bocha e phethela lilemo tse 10 e ne e qalelloe ho hlopheloa, empa ho ntse ho se nko ho tsoa lemina hobane e tli'o amoha ba bangata litokelo tsa bona.

O re se makatsang ke hore ba lokelang ho e fetisa ba e fetola sesebelisoa sa bona seo ba its'ireletsang ka sona, ha ba sa sebeletse sechaba. A re ho ne ho le bohlokoa hore lilemong tsena tse 200 melao e mengata e fetoe 'me bohle ba

keteke ka sebete le motlotlo hore linaha tse ling li tsebe ho nka malebela.

Phakisi o re o lumela hore ha tlhopho-bocha e ka fetisoa ho na le phetoho e ka suptjoang kahar'a sechaba sa Basotho, 'me re ka qalella ho ba le naha e nang le ponaletso, kholo le ho ntlafala ha baetapele ba eona ba lipolotiki. A re sena se tla thusa hore Basotho ba be le lerato la naha eleng seo mokhatlo oa habo esaleng o se tsetselela ka nako e telele.

O tsoetsepele hore Naha ea Lesotho e lokela ho fetola mofuta oa lipolotiki oo batho ba lebohanang ka mesebetsi ha ba lokela ho loanela sechaba, le ho sebeletsa litaba ka 'nete eohle

haholo khiri hore bacha ba sebelise litsebo tsa bona ho thusa 'muso ho atleha meralong ea ona. A re leha ho ketekoa bacha ba ntse ba fetohile ha ho letho, ba sebelisoa ke bapolotiki ho ikhaha eseng ho ba ntšetsa pele le ho ba hlalissetsa mesebetsi.

A re ketekelo ena e lokelela ho ba e tlišang sebete ha batho ba bua ka eona, ka hore ho shejoe lintlafatso tsa naha ka bophara, kaha joale litsela le marokho e le bothata. O re ho bohlokoa hore ba matleng ba ele hloko hore ketekelo ena ha se taba e nyane, ke leeto la bophelo ba Basotho, 'me bohle ba lokisetsang ketekelo eo ba tlose bo bona, ba eelleloe boqapi le litsebo tse

teng kahar'a naha.

A re marena a se a kene lipolotiking 'me leha sechaba se utloisoa bohloko b'a thola hobane ba shebile mejo ha ba tsotelle naha e senyeha matsohong a bona ke ka hoo le metseng ba sitoang ho kopanya sechaba. A re lipolotiki li lokela e be tsa 'nete, ka hore ba pusing ba sebeletse Basotho eseng ba ba fetole lisebelisoa hobane seo se thefula likhetho le ho theola seriti sa naha machabeng.

H'a phethela o itse batho ba ke ba itekole, ba be le lerato la naha joalokaha e le khothaletso ea Motlotlehi Letsie III, 'me baetapele bohle ba kenye thuto ena kahar'a sechaba mekhahlelong eohle ea sona.

IEC leetong la boitlhahlobo



likhetho esita le ho nehelana ka lipapatso ho litsi tsa phatlalatsa.

A re batho ba bonahala ba le lesisitheho ho ngolisetsa likhetho tse akaretsang le tsa Puso ea Libaka, ka hona ha ba rata hore mabala a 'ne a batalle litabeng tsa likhetho, ba ananele mekhatlo e teng ea bacha hore le eona e fane ka thuto molemong oa ntšetsopele le thahasello ea bacha nakong ea likhetho.

H'a phethela o itse likhetho tsohle li lokela ho ikarabella ho IEC, tsa Puso ea Libaka li tlosoe matsohong a Lekala la tsa Lehae, Borena le Sepolesa ho thusa tsamaisong ea likhetho e potlakileng, e se nang tšitiso ea letho, hobane IEC ke eona e nang le litsebi litabeng tsa likhetho.

Ofisiri ea Liphuputso IEC, Dorries Lintši o hlalositse hore IEC e kene leetong la boitokisetso ba meralo, 'me bophatlalatsi ke lefapha la bohlokoa le sa lokeleng ho shejoa feela empa le kenyeletsoe liqetong tse etsoang. A re ba rata ho bona litaba tsa likhetho li fetela sechabeng ka matla le ho hlahloba moo ba khibetseng. O re IEC e na le bothata ba palo e tlaase ea bakhethi 'me seo ha se khotsofatse.

A re litaba tse tekiloeng ke baphatlalatsi ha ba na ho li lahla, kaha e le tsona tse tla ba thusa ho lemoha moo likheo li leng teng, ho matlafatsa tšebetso.

Nthabeleng Seitlheko

Ho matlafatsa thahasello ea bakhethi litabeng tsa likhetho Komisi e Ikemetseng ea Likhetho (IEC), e lokela ho lula e fana ka thuto ho bakhethi nako le nako hobane seo se ka thusa ho tliša litholoana tse ntle. Tsena li bo-

letsoe ke Boitumelo Koloji, lebitsong la baphatlalatsi ba bileng 'mokeng oa ho hetla morao tšebetso ea IEC likhethong tsa Puso ea Libaka, ka la 22 Pherekhong monongoaha.

O re e bang IEC e ka matlafatsa likamano tsa eona le bophatlalatsi ho tla thusa kanetsong ea ho hasa molaetsa ka litaba tsa likhetho le ho atolosa phano ea lithuto. A re Basotho ba lahlehetsoe

ke thahasello ea likhetho 'me seo se etsa hore lipalo tsa bakhethi li thefulehe. O re sena se bakoa ke ngolisoe ea bakhethi e etsoang ka nako e khutšoanyane le phano ea nako e baliloeng ea ngolisoe.

Koloji o re Basotho ba tlameha ho fumantšoa thuto e matla ka litokelo tsa ho khetha le boikemelo, hape ba tsebe hore ba na le matla a ho khetha, 'me hoo ho tla thusa IEC ho fihlela tlhoko

ea mokhethi. A re ha e sa sebetse le bophatlalatsi e ka oela le ho theoha seriting ka lebaka la ho khetholla litsi tsa bophatlalatsi nakong ea likhetho.

A bonts'a ba hloka ho bona IEC e nang ponaletso e tlišang tšepo ho bona, e ikemetse le ka litaba tsa lichelete hore e tsebe ho nolofalloa ke ho etsa mesebetsi eohle. A re bothata ke riehiso ea ho fana ka thuto sechabeng nakong ea




MOB KIDDS EDUTAINMENT

Puzzle MOB 92-4519

Across


- 1. Mean old woman
- 6. "Carmina Burana" composer Carl
- 10. Calculating sorts
- 14. Where to find Hells Canyon
- 15. Emeril's restaurant in New Orleans' French Quarter
- 16. Roughly
- 17. Antibody producer
- 18. Policy of segregation
- 20. Entangle braces while kissing?
- 22. Dungeons and Dragons game co.
- 23. Diaphanous
- 24. The whole enchilada
- 27. Wallach of "Cinderella Liberty"
- 29. Book of legends?
- 33. Urban alley cat?
- 37. "Eeeww!"
- 38. Templeton in "Charlotte's Web"
- 39. Bar opener?
- 40. An end to alcohol and sex?
- 41. Shade of green
- 42. Dander
- 43. Punishing twist?
- 46. Luke's dad
- 48. Part of a Big Island volcano
- 49. Penny-___ (rinky-dink)
- 50. Cook one's goose
- 53. Game center?
- 55. Behave like a bunch of skunks?
- 60. Builds oneself up
- 61. "Save the " (Jack Lemmon film)
- 63. "Raid on Entebbe" carrier
- 64. Mama's mama
- 65. Cockamamie
- 66. Fiddle with a fiddle
- 67. Bat a 57-Down
- 68. Gung-ho



Down

- 1. Good humor man?
- 2. Heartthrob
- 3. Hotel idler
- 4. Cheap, inferior, or gaudy
- 5. Responds to a bumper sticker, perhaps
- 6. "Island With You" (1948 Esther Williams film)
- 7. Corrals
- 8. Twinkling
- 9. Burlesque
- 10. Partner in crime
- 11. Warm-up
- 12. "Take it or leave it"
- 13. Patch of lawn
- 19. "You're in ___ now!"
- 21. Menacing remark
- 24. Sharply stinging
- 25. Prom queen prop
- 26. It has kittens
- 28. It has cubs
- 30. Maurice Leblanc's "Prince of Thieves" Arsene
- 31. Catalyst
- 32. Thick drink
- 34. Suction devices
- 35. Unit of contraband
- 36. High-priced spread
- 44. Pennsylvania city near Horseshoe Curve
- 45. Hopi Indian doll
- 47. Almost make it home
- 51. "The Old Maid" Pulitzer-winning playwright Zoë
- 52. It's for suckers

- 54. Web site?
- 55. Chief navigator of the Enterprise
- 56. Revenuer
- 57. Biting bug
- 58. Popeye Doyle's prototype Eddie
- 59. Tear to pieces
- 60. Furry friend
- 62. Old Olds



DID YOU KNOW?



Ants can be better than pesticides for growing healthy crops, study finds

.....*Harnessing natural insect power can, with proper management, have higher efficacy than resorting to harmful chemicals.....*

Ants can be more effective than pesticides at helping farmers produce food, according to new research. They are better at killing pests, reducing plant damage and increasing crop yields, according to the first systematic review of ants' contributions to crop production.

Ants are generalist predators and hunt pests that damage fruits, seeds and leaves, leading to a drop in crop yields. A greater diversity of ants generally provides more protection against a wider range of pests, the study found.

The analysis looked at 17 crops, including citrus, mango, apple and soya bean in countries including the US, Australia, the UK and Brazil. "In general, with proper management, ants can be useful pest controls and increase crop yield over time. Some ant species have similar or higher efficacy than pesticides, at lower costs," researchers wrote in the paper published in Proceedings of Royal Society B.



TSA KEREKE

CLC e bula selemo

Tseliso Thakholi

Litho tsa Kopano ea Christian Life Community (CLC), ho hlaha Tikolohong e Kholo ea Maseru, li bile boikhutsong ba matsatsi a mabeli 'Mishoneng oa St. Vincent, Ha Matala, ka la 20 ho isa la 21 Pherekhong monongoaha, ka morero oa ho itlhahloba, ho itlhophela leeto la selemo sena le ho khakola mohoo oa bona oa selemo se secha o reng, "Nchafatsa tsohle."

Boikhutsong bona litho li ile tsa hlahlolloa ka maleba mafapheng a fapakaneng a

hore na hana ba lebeletsoe ho phela joang, bophelong ba bona ba letsatsi ka 'ngoe, kaha ba tsoanela ho batho ba lulang ba falimehile moeeng, 'me nthong e 'ngoe le e 'ngoe ebe ba bona Morena Molimo.

Haele Mosebeletsi oa tsa Bophelo, Sr. Pabatso Makapha eena o ile a fana ka thuto mabapi le lefu la mofetše le tsa bophelo bo botle. Mong'a 'mishone Fr. Augustinus Khakhane OMI eena o ile a hlahlolla litho tsa Ma-CLC ka litaba tsa boipheliso le ho ba le boitšepo, hobane ho bonahetse hore boholo ba bacha ba teng ba phela, feela ha ba itšepa ka mabaka a itseng.

Ho ea ka Mookameli oa CLC, Monghali Elia Lepoqo Moshoeshe ba simolla

loane ea hore na ba ea pele joang.

A phethela ka hore mohoo oa bona oa selemo sena, o tlii'o ketekoa ka Letsatsi la Borapeli la CLC le tlii'o tsoareloa 'Mishoneng oa St. David, Ha 'Mamathe, ka la 24 ho isa la 25 Tlhakubele 2024, ke seipone sa hore na Mohoo ka bo ona o bolelang, ba tlii'o phela joang ka ona, o ba matlafatsa joang tumelong ea bona ea Sekatholike kahar'a CLC le ho phela ka eona, e le mokhoa oa ho ikhalaletsa.

Ba bang ba litho tsa CLC, ba bileng teng boikhutsong bona, e leng Charles Roto le Ntsoaki Montlha, ba boletse hore boikhutso bona e bile ba bohlokoa haholo e le bacha, kaha bo ba tsosolositse borapeling ba bona le ho ba matlafatsa



bophelo ke Fr. Augustinus Khakhane OMI, Sr. Pabatso Makapha, Mofumahali 'Makatleho Seutloali le Fr. Emmanuel Mokhofu OMI, moo a neng a hlile a manolla ka botebo mohoo oa CLC, e le ho thusa litho ho o utloisisa hantle.

Mofumahali 'Makatleho Seutloali eo e leng motataisi oa CLC 'Mishoneng oa St. Vincent, eena o ile a hopotsa litho ka botebo

selemo se seng le seng ka ho ba le boikhutso e le ho itlhahloba, empa monongoaha ka ho khetholoha ba itšetlehile ka mohoo oa bona oa selemo sena, "hobane ha ho na motho ea ka ba a nchafatsa letho, empa eena a sa nchafala haholo ha re tla litabeng tsa moea."

O re boikhutso bona morero ke hore ba hetle morao ebe ba etsa meo-

mafapheng a fapakaneng a bophelo. Ba tiisa hore ba ithutile lintho tse ngata haholo mabapi le tumelo ea bona e Katholike. Ba re tse ntle tse molemo tseo ba li khotseng boikhutsong bona, ba tlii'o phela ka tsona le ho li fetisetsa ho bana ba bang ba bo bona, kaha CLC ke tsela ea bophelo e ba thusang ho bopa bongoe le lerato. "CLC ke lelapa". Ba rialo.

2023-2024 SELEMO B Sontaha sa 4 har'a selemo

Deuteronomo 18,15-20

Pesalema 94

Ba-Korinthe 7,32-35

Mareka 1,21-28

Khothatso



Ke tla ba hlaisetsa moprofeta

Thutong ea Pele le uloa tšepiso ea Morena ho Moshe ea hore o tla le hlaisetsa moprofeta. Ena ke 'ngoe ea litšepiso tse phethahetseng tse hlahang Testamenteng ea Khale, 'me e phathahalitsoe ka Kriste joaloka Testamente e Ncha e senola. Libekeng tse hlano tse fetileng le ile la keteka ho tla ha moprofeta ea tšepisoeng ka ho inkela botho ha Morena Molimo ka Kriste. Libekeng tse tlang hape le tla boela le keteka tsoho ea moprofeta e moholo ho baprofeta bohle, Morena Jesu.

Taba ea hore Kriste o bitsoa moprofeta e kolla ntheng ea hore meleng ea Moshe lentsoe "moprofeta" le ne le bolela "mohokahanyi" lipakeng tsa Molimo le motho. Moshe o ne a buella batho kapel'a Morena, ka mokhoa o tsoanang o na bolella batho seo Morena a se buileng. Ho ipapisitsoe ka mosebetsi oo Morena Molimo o ile a tšepisa ho hlaisa moprofeta ea tsoanang le Moshe ea tla buella sechaba kapel'a Morena.

Lentsoe moprofeta le tsoantša Messia ea tšepisoeng; ha bohle ba lebetse moprofeta ea tla ba lopolla litabeng tsa lefatše Morena Molimo o ile a romela ho fetang moprofeta e leng Mor'a Inotsi e leng Jesu Kriste. H'a botsoa na ke moprofeta o ile a hana (Joannes 1:21) empa bohle ba ile ba mo nka e le moprofeta hobane o ne a phethahatsa litšepiso tsohle tsa Molimo Ntate. (Joannes 6:14, 7:40)

Thuto ea Bobeli ke ntšetsopole ea beke e fetileng moo ba sa nyalang ba sa shebaneng le tsa lefatše (1 Ba-Korinthe 7:25, 31), ba le furaletse ba se ba phela ka tšepo ea tse tlang. Bekeng ena Paulosi o eletsa balumeli ho phela bophelo boo Morena a ba abetseng le ho ba biletse ho bona. Moea o ile oa nyenyeletsa Paulosi ho ba tsebisa hore Morena o rata hore ba phele ntle le tšabo ea letho.

Bohle ba seng lenyalong ba inahana ka hore na ba tla thabisa Morena joang e le hore ba halalele 'meleng le moeeng. Empa ba lenyalong ka lehlakoreng le leng ba shebane le tsa lefatše, e leng ho thabisa balekane ba bona ka hona ba arohile likoto tse peli; ho thabisa Morena le lefatše.

Ho phela bophelo bo lokelang ba lenyalong ba lokile ho phela bophelo bo nang le boikarabello, ba be mehlala e metle ea bohle hape ba inehele ho Morena ntle le ho hetla morao. Leha ho le joalo, ka lebaka la litaba tsa lefatše ba lokela ho hlokomela balekane le malapa a bona. Ba se le bale pitso ea Moea o Halalelang o phelang ka ho bona, ka ho bontša lerato ho bohle e le ho hlomphe Melao ea Morena. Mokriste a ka ithabela ka bophelo ba tumelo ho Kriste ntle le boitlami empa ebe ho khahlang mahlong a Morena.

Evangeling Kriste o ruta joaloka motho ea nang le matla joaloka moruti ea fetang moholo oa sechaba, hobane maemo a hae a le tlaase. Matla a Kriste a bonahala Testamenteng e Ncha moo a hlolang matla a Satane, 'me a hloma 'Musu oa Morena lefatšeng. Ho ne ho e-na le monna ea nang le moea o litšila, ketsahalong ena ea pholo ea hae re fumana melaetsa e 'meli e leng moo Kriste a lelekang moea o litšila. Moea oo o ile oa bona Kriste e le Messia, ea tloisitsoeng ka Moea oa Morena a bile a e-na le matla holima meea ea litšila. Le hoja Kriste a ne a patile boleng ba hae ho balateli ba hae Moea o litšila oa bo senola ka ho 'mitsa Jesu oa Nazaretha le ea Halalelang oa Molimo.

Ka Kriste bohle re bona phethahatso ea Morena eo a ileng a e etsetsa Moshe ea ho romela moprofeta ea tsoanang le eena. Ka Paulosi ea nyenyeletsoeng ke Moea o Halalelang, re ithuta hore ba lenyalong ba se iphathahanye hakaalo ka tsa lefatše, empa ba latele pitso ea bona.

Bahalaleli har'a Beke

- 29 Pherekhong **Dallan**
- 30 Pherekhong **Hyacinth**
- 31 Pherekhong **John Bosco**
- 1 Hlakola **Brigid**
- 2 Hlakola **Cornelius**
- 3 Hlakola **Blaise**

Tšeliso Thakholi

Re ithatafallelitse-Thatho

Sehlopha se neng se hlaha maemong a bobeli a Loko e ka Boroa ea Mokhahlelo oa A Division, FC Summit, se bonahalang se hula ka boima nakong ena ea lipapali tsa ho qetela tsa Liki ea A Division, se theohetse maemong a bone kamor'a ho shapua ke Majantja ka phafa ea 3-1, Lebaleng la Sekolo se Phahameng sa 'Matikoe, Ha 'Mantšebo, ka la 20 Pherekhong monongoaha.

Ha se ne se ka hapa papali ena, kaha lihlopha tsena tse tharo e leng Members,

Majantja le FC Summit li petetsane habohlako maemong a kaholimo a loko, 'me sehlopha ka seng se ipatla ka holimo, FC Summit e ne e tla be e nyolohetse maemong a bobeli, Members e le maemong a pele, 'me Majantja e theohetse boemong ba boraro lokong. Mokhahlelong oa pele Majantja e ne e ile ea halala FC Summit ka ho e shapa 5-0 ka la 2 Tšitoe ngoahola.

Kamor'a papali ena ea bona le Majantja e se e lokela ho sebetsa ka thata ho hapa lipapali tse robeli tsa eona tse setseng, e le hore e tsebe ho hloella tsulung ea loko. FC Summit e tlii'o bapala le Qacha's Nek



LMPS, e le papali ea eona ea bobeli ea Mokhahlelo ona oa ho qetela oa Liki ea A Division.

Puisanong le Mokoetlisi oa Sehlopha sa FC Summit kamor'a papali ena, Bokhane Thatho o itse mola o kamorao oa FC Summit o ithatafallelitse mosebetsi oa ho bona hore ba koale masoba ohle, ao ba lireng ba ka kenang ka ona, ka ho se buisane ho qoba ho etsa liphoso tse ngata tse sa hlokahaleng. O re mola o kamorao o ne o hlile o sitoa ho sebetsa 'moho.

"Batho bana ha ba re hlabatho lintlha ka libolo tseo re ka reng ba re hlola, ba ne ba phunya lebota la rona le kamorao hare. Ke hore mola o kamorao oa rona o ne o hloleha ho sebetsa 'moho. Ke hona moo ke boneng ho bile le bothata hona teng." O boletse joalo a bile a tiisa hore ba lokela ho tla lokolisa lebota leo le kamorao, ho tloha ho sethiba-thibane le mokhoa oa ho ema e le hore ba tsebe ho sebetsa 'moho.

Athe Mokoetlisi oa Majantja, Bafokeng Mohapi

eena o itse ka tlhoho ena e ka re tsela ea bona e ntse e phetleha, le hoja ntoa e sa le kholo. A re ba khotsofetse haholo ke tsela eo ba bapetseng ka teng, ho latela maemo a lebala leo ba neng ba bapalla ho lona.

A bontša hore papali ena e ne e le ea tse ling, tse matla tseo ba qothisanang lehlokoa le FC Summit ho tseka maemo a pele, 'me ha ba se ba e fetile ba se ba batla ba butse tsela. Papali e hlahlamang eo ba tlii'o e bapala ke e lipakeng tsa bona le Quthing LMPS, mafelong ana a beke.



CFL e bula selemo ka litholisano

Tšeliso Thakholi

Selemo se secha sa lipapali tsa Chess se qalile, 'me Mokhatlo oa Lesotho oa Papali ea Chess (CFL), o hlophisitse tl-

holisano ea bona ea pele, e bulang selemo e bitsoang National Chess Championship, e boemong ba Tikoloho e Bohareng. Tlholisano ena e tliilo bapaloa ka la 27 Pherekhong monongoaha, sebakeng se tlang ho phatlalatsa ha lithlophisano

li se li phethetsoe.

Tlholisano ena e tlii'o simolla selemo, e arotsoe ka mekhahlelo e 'meli ea banana le basali e leng Ladies Section le Open Section, 'me ka la 3 Hlakola e tla boela e tšoarelola Litikoloho tse ka Boroa le Leboea. More-ro o moholo oa lithlophisano tsena ke ho hloaea libapali

tseo e tlang ho ba bompoli ba litikoloho, le ho bopa mokhethoa o tlang ho emela naha lithlophisano tsa machaba tsa Chess Olympiad 2024 tse tliilo tšoaroa ka Mphalane monongoaha. Bahloli ba tla ikhapela meputso le mehope litikolohong tsohle tseo lithlophisano tsena li tliilo tšoarella ho tsona.

Raliphatlalatsa oa CFL, Selatela Khiba o supile hore leha likatleho e bile tse kholo selemo le selemo tse tliisoang ke lithlophisano tsena, empa ngongoreho e kholo ea mokhatlo ke lipalo tse fokolang haholo tsa basali kahare ho papali ea Chess. A re banana ba qala ba le bangata haholo boemong ba Likolo tsa Mathomo le tse Phahameng, empa ha ba se ba le Likolong tse Kholo tsa Lithuto tse Phahameng, lipalo tsa bona li qala ho fokola haholo. "Kamor'a ho qeta lijunifesihi teng, bo-'m'e eba bothata ho bapala papali ea Chess."

A re ka thoko ho meralo ea Papali ea Chess lefatše ka bophara, ea ho leka ho

hohela basali ho bapala Chess, bona hae koano ba etsa maoala ohle a ho bona hore banana le basali ba tla ka bongata papaling ea Chess, ka ho ba tšoarella lithlophisano tseo e leng tsa bona feela, 'me ba ntse ba bapala lithlophisano tse tšoanang le tsa bahlankana, ba bile ba kopantsoe 'moho le bona ba ntse ba fumana meputso ea bona e khethehileng, e le ea basali le banana feela. "Sena re se etsa ka morero oa ho ba hohela hore ba tle papaling ena." A rialo.

A tiisa hore le lithlophisano tseena ho ntse ho tšoana, kaha ba ntse ba tlii'o fumana mehope le meputso ea bona e le banana le basali feela. A re leha ba ntse ba leka ho ba tsosa morolo le ho ba khotsoletsa ka matla ho bapala Chess, lipalo tsa bona li ntse li fokola haholo. A ipiletsa ho bona ho itahlela ka setotsoana papaling ea Chess. A phethela ka hore lithlophisano tseena, tebello ke hore banana le basali ba tlii'o hlophisano ba tla tla ka bongata.



Mokoetlisi oa Linare o'a itokolla

Tšelisothakholi

Eo e neng e le mokoetlisi oa Sehlopha sa Bolo ea Maoto sa Linare, Monghali Leslie Notši o fihletse tumellano le botsamaisi ba sehlophaho itokolla mosebetsing ka la 23 Pherekhong 2024. O li siile le batlatsi ba hae, Benghali Freeze Ntene le Tente Molapo nakong ena e setseng ea mokhahlelo oa ho qetela oa Liki e Kholo.

Puisanong le Raliphatalatso oa Sehlopha sa Linare, Mofumahali Tlhoholofatso Lebesa o boletse hore mokoetlisi h'a lelekoa, empa ba bile le lipuisano tsa khotso le botsamaisi ba sehlopha hore ho bonahala mosebetsi oa hae, o ka



thoko le oa sehlopha e ka ea sekisetsana kaha e le boima ka bobeli. Ka hona o kopa hore ba mo lokolle a tsebe ho etsa mosebetsi e meng ea hae e mengata, le ho fa bakoetlisi ba bang monyetla oa ho ntšetsapele mosebetsi o motle oo a neng a se a o qalile kahar'a sehlopha.

Potsong ea hore na ho itokolla Notši haholo nakong ena e mahlonoko, eo lipa-

pali li seng li haba ho tla fela ha e na ho ama sehlopha? O itse sena se ke ke sa ama sehlopha kaha ka lebaka la mosebetsi oa hae o mongata a ne a sa be teng ka mehla. A re o thoholetsa mosebetsi oa hae o motle oo a o entseng kahar'a sehlopha. A re boteng ba hae le hoja e bile nako e khutšoanyane, bo ile ba tlisa phetoho e kholo kaha ngoahola Linare e phethetse Liki e Kholo e le

boemong ba bobeli.

Ho sa le joalo, Raliphatalatso oa LeFA, Monghali Mikia Kalati o latotse menyenyetsi ea hore Monghali Notši o tena a itokolla e le hobane e se e il'o ba mokoetlisi oa Sehlopha sa Naha sa Likuena. O itse litaba tse joalo a ke ke kena ho tsona kaha e se tsa 'nete, litaba li le teng li tla phatalatsoa hantle ka molao.

Notši ke e mong oa ba-

koetlisi ba nang le litsebo tse pharaletseng tsa bolo ea maoto le tsa bokoetlisi, 'me h'a fihla kahar'a sehlopha selemong se fetileng sa lipapali sa 2022/2023 a kena lieteng tsa Teboho Moloi, o ile a ntša Sehlopha sa Linare tebe-tebeng eo se neng se khasa kahare eona ea ho se bapale hantle le ho hloleha ho hapa lipapali. A se beha boemong ba bobeli kahar'a lihlopha tse 'ne tse ka holimo lokong. Sena se etsahetse kamor'a lilemo tse telele Linare e sesa kahar'a maqakabetsi.

Hara a mang a mangolo ao a nang le ona a bokoetlisi ke la A License Diploma leo a neng a le fumane Naheng ea Germany ka 1992 le la Diploma in Physical Training Lefapheng la Bolo ea Maoto ho tsoa Hangarian Sports University, Hangury ka 1995. O boetse a kenela lithupelo tse 'maloa tse tšoarolang ke linaha tse ling kahar'a naha.

Mohope oa AFCON o bulehile

Tšelisothakholi

Litsela tse lebang ho seka-makhalakhang a Mohope oa African Cup of Nations (AFCON), li

bulehile kamor'a hore lihlopha tsa bolo ea maoto tsa Afrika, tse ntseng li isana holimo le tlaase mohopeng ona, li phethele lipapali tse tharo tsa tsona mokhahlelong ka 'ngoe oo li pannoeng

ho ona. Lipapali tsena tse tliil'o fihla pheletsong ka la 11 Hlakola Monongoaha, li ntse li bapalloa mabaleng a fapakaneng a Naha ea Ivory Coast.

Sekhahla se sehoho seo lihlopha li bapetseng lipapali

tsa tsona tsa ho qetela, se hautse barati le batšehetsi ba bolo ea maoto bao esaleng ba boha lipapali tsa AFCON ka thahasello e kholo, ho tloha ha li qala ka la 13 Pherekhong monongoaha. Mokhahlelong oa A Naha ea Equatorial Guinea e bontšitse Tikoloho ea Afrika le lefatše hore ha se potele e khoathoang ka lehla-ka joalokaha batho ba bang ba ne ba hopolaka ho paputla Ivory Coast 4-0 kapele ho batšehetsi ba eona ba neng ba tletse lebala.

Ka ho tetekoa ke Equatorial Guinea, Ivory Coast e se e tsoile lithohisanong tsena. Sena se makalitse barati ba bangata ba bolo ea maoto. Equatorial Guinea e fetela pele mokhahlelong o hlahlamang oa seka-makhalakhang le Nigeria kamor'a hore e tsoe ka lesoba la nale, ha e ne e hlohlora Guinea Bissau ka thupa ea 1-0.

Haele mokhahlelong oa B, Cape Verde e atlehile ho fetela pele le Egypt kamora hore li bapale ka seahlo sa 2-2, papaling e neng e le bolutu haholo. Athe sehlopha se neng se shebiloe ka leihlo le nchocho mokhahlelong ona e leng sa

Ghana se ile sa tšeremisa babohipang mangole, ha se ne se bapala ka ho lekana le sa Mozambique ka 2-2, eba ho felile ka sona se tsoile lipapaling tsena.

Athe mekhahlelo ea C, D, E le F ka tatellano ea eona, tse atlehileng ho fetela pele kamor'a ho phethela lipapali tsa tsona ke tse latelang, Senegal, Cameroon, Angola, Burkina Faso, Mali, Afrika Boroa, Morocco le DR Congo.

Ha li thakhola Mokhahlelo ona oa bobeli mafelong ana a beke ka la 27 Pherekhong, ke mona moo Angola e tla koebana le Namibia, Nigeria e bapale le Cameroon. Letsatsing le hlahlamang Equatorial Guinea e bapale le Guinea, Egypt e botsane lipotso le DR Congo. Ka la 29 Pherekhong li tla ema tjena, Cape Verde e tla isana holimo le tlaase le Mauritania, bompoli ba sireletsang sekola Senegal ba fatelane makoatsi le Ivory Coast e keneng ka ntsoepelele.

Lipapali tsa ho qetela tse tliilo ba matla haholo ka la 30 Pherekhong li tliilo ba lipakeng tsa Mali le Burkina Faso, Morocco le Afrika Boroa. Lihlopha tse peli tse tla atleha li bapala makhalakhang ka la 11 Hlakola 2024.

